

Segun linguista, Ramon Todd Dandare

Uzo di Ingles entre nos hobennan ta un “cos di moda”

ORANJESTAD - Tin un tendencia entre nos hobennan di scol di papia entre nan mes Ingles, enbes di papia nan lenga materno esta Papiamentu.

E linguista Ramon Todd Dandare ta mira esaki como “cos di moda” entre nos hobennan, ya cu tur periodo tin su moda, y un di nan ta e uzo di cierto terminologia na Ingles.

Sinembargo sr. Todd Dandare no ta nenga cu influencia di Ingles ta mundial; ya cu tur pais di mundo ta sinti e influencia di Ingles dor di Internet, programa di television via cable, cine, musica, etc...

Te hasta sr. Todd Dandare a bisa cu el a lesa recientemente un articulo unda a ser informa cu

mundo cientifico a kita Latin como un lenga pa duna terminologia den biologia, y awor nan a introduci Ingles como lenga universal pa terminologia den biologia y botanica. Pues uzo di Ingles ta hayando un forza masha grandi mes den mundo. El a manifesta cu den Censo 2010 ta ser musta cu e cantidad di hende

cu ta papia Papiamentu como nan prome idioma na Aruba, a keda mesun cos cu 10 aña prome.

Mester warda aki 8 aña -ora cu otro censo lo tuma luga- pa wak si e influencia di e Ingles entre nos hobennan di awendia lo tin su impacto, y si e cantidad di hende cu ta papia Papiamentu lo baha; y esun cu ta papia Ingles

lo subi.

“Mi ta kere cu e ta un cos di moda e ta, aunke enberdad e no ta un cos recomendabel”, segun e linguista di Papiamentu. Finalmente, sr. Todd Dandare ta haya lamentabel tog cu nos hobennan ta papia un idioma cu no ta di nan, enbes di papia nan propio lenga.

